



Գ Ր Ա Կ Ա Ն

ՄԱՐԻԱՄ ՎԱՐԴԱՆՅԱՆ

«ՈՐՊԷՍ ՄԻ ՀՈԳԵԻՈՐ ԼՈՒՍՈՅ ԱՌԱԽՕՏ...»

ԱՅՆՔԱ՛Ն ՍԻՐԵԼԻ ԼՈՒՍԻՆԵՆ



«Լուսինէն նոյն հաւատով, նոյն նուիրումով պայծառացրեց նաեւ Հայաստանի եւ Սփիւռքի Հայոց աղօթքի տաճարները եւ բեմահարթակները՝ հմայիչ կատարումովը մեր Հոգեւոր ու ժողովրդական երաժշտութեան:

Բոլորիս Հոգիներում միշտ պիտի հնչեն Լուսինէի «Տէր ողորմեա»-ն եւ «Առաւօտ լուսոյ»-ն: Հէգ Լուսինէն ինքն եւս իր աղօթարոյր երգով, իր հաւատաւոր Հոգեւոր, իր անձնագուհ նուիրաբերումով մեր Եկեղեցու ու ազգի կեանքում մշտապէս Հանդիսացաւ մի Հոգեւոր լուսոյ առաւօտ»:

ՎԱԶԳԷՆ Ա

ԿԱԹՈՂԻԿՈՍ ԱՄԵՆԱՅՆ ՀԱՅՈՑ

Իբրեւ սկիզբ

Ես հաստատ համոզված եմ, որ եթե Հայոց գրականության բառ ու խոսքի վարպետին երբևիցե խնդրեին գնահատել, ասենք, Հայոց արվեստի մյուս վեհությանը, որ էր Լուսինե Զաքարյանը, անշուշտ իր Հերոսի՝ Օհան-ամու հանգարտությանը ձեռքը կառնեիր համբերանքի չիբուխը, կնատեր թախտին, խաղաղորեն կքաշեր այն և, խորը հոգոց հանելով, կասեր. «Մարգը գնացական է, նրա գործը՝ մնացական. ըսել է՝ ինքն է մնացական: Ա՛յ, խոսքի օրինակ, էս շաքարը պցեցիր չայի մեջ, հալավ,

կորավ, չկա. բայց չայն անուշցավ: Էնպես էլ լավ մարդը կմեռնի, բայց նրա լավ գործը աշխարհքը կանուշցնեն: Թե չէ առանց լավ մարդու աշխարհքը չա՛տ դառն է՝ օձի լեղի...»:

Հիմա երկուսդ էլ չկաք. ո՛չ դու՝ խոսքի վարպետդ, և ո՛չ էլ դու՝ երգարվեստի թագուհիդ: Երկուսիդ մասին էլ խոսում ենք անցյալով: Սակայն այս անցյալը միայն ֆիզիկական գոյությունն է պարագրում իր մեջ: Իրավամբ երկուսդ կաք, ապրում եք, ձեր արած-դրածով լցնում, նաև զարգարում մեր օրերը: Լավը, գեղեցիկը, վսեմը երբեք ժամանակի սահմաններում չեն պարփակվում: Դրանք հավերժի կնիքն ունեն և ապրելու են, քանի դեռ մարդկությունն ինքն էլ կա:

Իրավամբ, ես և դու ծանոթներ չենք եղել, սիրելի Լուսինե: Գուցե նաև անհարկի է Հիմա քեզ այսքան մտերմիկ տոնով դիմելը: Սակայն թվում է, թե մենք մտերիմներ ենք, որովհետև քո երգը ասես իմ հոգուց է շնչել: Այն՝ ազգիդ, անգամ աշխարհի սեփականությունն է: Իսկ քեզ, համոզված եմ, երբեք չեն մոռանալու: Դու ապրողների հետ համաքայլ գնալու ես դեպի հավերժություն այնքան ժամանակ, քանի դեռ Երկիր մոլորակի վրա թեկուզ մեկ հայ կա և քանի դեռ շնչելու են հայոց «Անտունի»-ն, «Դլե յաման»-ը, «Կուունկ»-ը, եկեղեցիներում ղողանջելու են «Տէր ողորմեա»-ն, «Յորժամ...»-ը, «Սուրբ, սուրբ»-ը, քանի դեռ հայ հավատավորը ծնրադիր իր ազոթքն է առաքելու առ Բարձրյալը, հայցելու է քեզ այնքա՜ն հոգեհարազատ Տիրամոր բարեխոսությունը...

Ես կարող եմ խոսքս ամբողջությամբ կառուցել անգամ քո մասին գրված հրաշք տողերով, որոնք ասես մի համահունչ սիմֆոնիա են կազմում, լրացնում մեկը մյուսին: Փույթ էլ, թե ասվել են տարբեր երկրներում, տարբեր մասնադիտությունների ու ազգությունների պատկանող մարդկանց կողմից, տարբեր ժամանակներում: Դրանք այսօր ևս նույնքան կենդանի են, շնչել, ինչպես քո երգը, ձայնիդ բյուրեղյա ղողանջները, անհղծելի ու ջերմ ժպիտդ, ծիծղուն աչքերիդ հմայիչ ու անմեկնելի փայլը: Այո՛, դու կաս...

«Մարդ էլ կա, մարդ էլ...»

Բանասիրական գիտությունների թեկնածու Սուրեն Շտիկյանը մահվանդ տխրալից առիթով մի հոգված էր գրել, ուր նկարագրում էր գրականության ինստիտուտում տեղի ունեցած մենահամերգդ: Այնպես կենդանի էին այդ տողերը, որ թվում էր, թե ես ևս ներկա եմ եղել այնտեղ: Նկարագրելով Բարսեղ Կանաչյանի «Օրոր» երգի կատարումդ, գրում է. «Տեր իմ Աստված, դա ե՞րգ էր, թե՞ հրեշտակների քաղցրալուր մրմունջ, թե՞ տիեզերական խորհրդավոր անսահմանությունից մեզ հասնող անմեկնելի ղողանջների մի հրաշք-համադրություն: Դա ե՞րգ էր, թե՞ անճառելի շնչումների, հոգու աննյութական ու անքնին կայսկումների, մայրական անքիծ ու խանդաղատ սրտի սրբազան ալեբախումների մի քաղցրօրոր վիժակում...»:

Հետո նա պատմում էր քո մասին, ֆրանսիական խստապահանջ արվեստասերին ներկայանալուցդ հետո ստացածդ «կարտ բլանշ»-ներին, քո համեստության ու ամօթխածության մասին: Ես քեզ այսքան մանրամասն նկարագրել չեմ կարող, քանի որ դու ինձ և իմ նման շատերի համար միշտ էլ մնացել ես որպես անհասանելի մի բարձունք, անիրականանալի մի երազանք, թեև ուսանողության տարիներին հաճախ էիր երգում Պետական Համալսարանի երգչախմբի հետ, որի ղեկավարը ամուսինդ էր՝ Խորեն Պալյանը, որ նաև ինձ գրաբար էր ուսուցանում, քո մասին ակնածանքով էր պատմում իմ ուսանող ընկերուհին: Հետո քեզ տեսա Մայր Աթոռ Սուրբ Էջմիածնում, երբ ամեն Պատարագից հետո, հանդարտ քայլերով, ասես խորապես ապրելով ու զգալով բակում թագավորող անդորրն ու խաղաղությունը, առաջանում էիր դեպի ավտոբուսը, որը քեզ, մյուսների հետ միասին, դարձյալ պիտի քաղաքամայր Երևան տաներ: Ո՛չ տեսնում էիր քեզ ուղղված զարմացական հայացքները, ո՛չ լսում էիր քո հասցեին ասված հիացական խոսքերը և ո՛չ էլ ուշադրության արժանացնում գործընկերներիդ չարախոսությունները: Այս ամենը քեզ համար վերացական էին, անիրական, անըմբռնելի: Զնամրիտը միայն իրական աշխարհն էր իր հրաշք գեղեցկությունը, Աստվածային արարչագործության կատարելությունը: Իսկ դու այդ կատարելության ամենաներդաշնակ տարրն էիր, կամ մեծ բանաստեղծի խոսքի փրկսոփայական ընկալման լավագույն դրսևորումը՝ «Մարդ էլ կա, մարդ էլ...»:

**«Դա մեռնողներին պետք չէ, ես գիտեմ,
Բայց ապրողներին շա՛տ է հարկավոր...»**

Սևակյան այս խոսքերի փոքր-ինչ տարբերակված տողերն է հաճախակի, ամեն պատեհ առիթով կրկնում Գարեգին Ա Ամենայն Հայոց կաթողիկոսը, երբ ցանկանում է ապրողներին հոգում վերարթնացնել, վերակերպվորել մեծանուն ու մեծահարգ այն մարդուն, ում հիշատակն են տվյալ պահին ոգեկոչում ներկաները: Այս խոսքերը, հավատա, հնչեցին քեզ համար ես:

Դու հիմա ճիշտ վաթսուհին կլինեիր: Քայլող, շնչող ու ապրեցնող մի հրաշք, աստվածապարզ և շնորհով օժտված մի իրական երազ, որ երազի թևով, իբրև մի հեքիաթ, ամփոփվեցիր Սուրբ Գայանե վանքի բակում: Քեզ հրաժեշտի ու բաժանման սրտակեղեք խոսքեր ասացին ծանոթ-բարեկամներդ: Հիշեցին մահվանիցդ առաջ, Հայոց լեզվաբանության Հմուտ գիտակ Ռաֆայել Իշխանյանի հետ հիվանդանոցում ունեցածդ վերջին զրույցի ժամանակ տվածդ հարցը, թե «Մեռնելը շա՛տ վատ բան է, ի՞նչ եք կարծում», որին հետևել էր նույնքան պարզ, սակայն իմաստալից պատասխանը. «Եթե մարդը Աստուծո մոտ է գնալու, վատ բան չէ»: Դու մի պահ լռել էիր և ապա ավելացրել. «Ես էլ եմ այդպես կարծում»:

Քեզ ծածկեցին հողի գորշ շերտով, սակայն քեզնից ճառագող լույսը սփռվեց ամենուր, մարդկանց հոգիներում ապրեց որպես «Խորհուրդ

խորին», «Սայլն այն իշաներ», «Հավուեն-Հավուեն», «Հովիկ մի պայծառ տեսի», «Տիրամայր», «Գարուն ա», «Զինար ես», «Քեկեր-ցուրեր»... Մի ողջ աշխարհ, որ խոնարհվել ու ծնկի էր եկել երգարվեստիդ կատարելության առջև, արտասովեց քեզ Համար:

Սակայն... շրջապատում իշխող խաղաղությանը թագավորող շիրիմդ չմոռացվեց: Շատ անգամ եմ տեսել հոգուդ մաքրությունն ունեցող ճերմակ տապանաքարիդ շուրջը բոլորված տարեց ու մանուկ երկրպագուններիդ, մտերիմ-հարազատներիդ, անգամ նախանձողներիդ, ովքեր թե՛ Հայաստան աշխարհի, թե՛ Արցախի և թե՛ Սփյուռքի տարբեր վայրերից իրենց հարգանքի ու խոնարհության տուրքն են բերել՝ քեզ ընծայելու: Ձայներիզներից Հնչել է երգդ ու ինձ թվացել է, թե ուր որ է, մի կողմ կդնա շիրմաքարդ, ու մերօրյա վկադ վեր կելնես այնպեղից՝ կրկին միանալու այն ձայներիզին, որից Հնչում է քո զանգակ ձայնը, ելևէջում մարդկանց հոգիներում, ստիպում նրանց լինել հեղ ու խոնարհ, Համեստ ու բարեպաշտ, ինչպես էիր դու, շարունակել այն շիտակ ուղին, որի սկզբնավորողն էիր, իսկ լուսացույցը՝ քո անմահ երգը... Այսպես են քեզ ծանոթացնում երկրպագուներդ մերօրյա սերնդին, ովքեր բախտ չեն ունեցել քեզ անձամբ լսելու կամ տեսնելու:

Աստծո՛ գործերն անքննելի են, սիրելի՛ Լուսինե: Բայց մենք քաջ դիտենք, որ ամեն ոգեկոչում քեզ այլևս անհրաժեշտ չէ, դա մեզ է պետք, որպեսզի այս կերպ փոքր-ինչ մաքրվենք, վեհանանք՝ մեծերիդ սրբությունից մի փոքրիկ շուղ մեր հոգիներում ունենալու Համար:

«Երևեկ նրան, ով իր գործով

Կապրի անվերջ, անդադար...»

Մեծահարգ Խորեն Պալյանի Հետ գործընկերոջս ունեցած զրույցի ժամանակ վերջինս խնդրել էր մի հոգված՝ «Էջմիածին» ամսագրի հերթական Համարում տպագրելու: Նա նաև ավելացրել էր, թե ես՝ ամսագրի խոնարհ աշխատակցուհիս, ես կարող եմ պատրաստել Լուսինեի մասին տպագրվելիք հոգվածը: Մի քանի վայրկյան տևող լուսթյանը Հետևել էր պատասխանը. «Իսկ ձեր աշխատակցուհին ճանաչե՞լ է Լուսինեին»:

Շատ սիրելի Խորեն Պալյան, Ձեր աչքերի առջև է Հասակ առել, Ձեր օգնությամբ անձեռակերտ բարձունքներ նվաճել Լուսինեն՝ այն Սփյուռնան, որ առաջին մենահամերգներն էր տալիս Հայաստան աշխարհում: Ինքը Հանդարտ ու խաղաղ հոգով բեմ էր ելնում, բայց Դուք էիք ապրում հուզումն ու անհանգստությունը: Սակայն միասին էիք կիսում Հաղթանակների բերկրանքը: Ինձ թվում է, որ այդ Հաղթանակները միայն հրաշք երգչուհուն չեն պատկանել, դրանք անուղղակիորեն նաև մերն են եղել, ողջ Հայ ժողովրդին, Համայն աշխարհին: Լուսինեն հարազատ ու մտերիմ է եղել ոչ միայն նրանց, ովքեր շրջապատել են իրեն, այլ առավել զնահատելի է եղել նրանց կողմից, ովքեր որպես անձնավորություն չեն ճանաչել նրան, սակայն որպես աստվածային մի էակ, որի արվեստի լեզուն

Հասկանալի է, եղել Համայն մարդկությանը, պաշտել են, սիրել ու մեծարել: Ես նրանցից մեկն եմ, ովքեր Հեռվից են սիրել Լուսինե-Հրաչքին:

Նաև կամենում եմ ասել, որ մեծություններին նկարագրելու Համար պարտադիր է նրանց անձամբ ծանոթ լինել: Գեղեցիկը, վսեմը, կատարյալը հանուրի սեփականությունն են, և ամեն ոք կարող է նկարագրել մեծությունն իր ընկալման կարողությունների սահմաններում: Որքան ինձ Հաջողվեց հարգանքի ու նվիրումի խոսքեր ասել մեծն Լուսինեի մասին, չգիտեմ, սակայն մի ըմբռնման միայն անժխտելի է. Մեծերը սովորական մահկանացուներին գովեստի ու վեհության ջերմ խոսքերի կազմի վրա չեն, մեզ է անհրաժեշտ նրանց Հաճախակի վերհիշել, որպեսզի նրանց օգնությամբ կարողանանք հարգել ինքներս մեզ, մեծարելով նրանց՝ մենք նույնպես վեր բարձրանանք, որ կարողանանք իրավամբ կրկնել Ամենայն Հայոց Բանաստեղծի խոսքերը.

«Երեկ նրան, ով իր գործով

Կապրի անվերջ, անդադար...»:

